

## Headlines

1 केन्द्री गृहमंत्री अमित शाह होरें आतंकवाद दा नां शड़ा मकाबला करने सगुआं एहदे पूरे पराते ढांचेतंत्र गी खत्म करने पर जोर दिक्ता ऐ ते आक्खेआ ऐ जे सब्बने आतंकवाद रोधी एजेंसिएं गी ऐसा सख्त रौंह अपनाणा लोड़चदा तां जे कोई नमां आतंकी संगठन वजूद च नेई आ।

2 उपराज्यपाल मनोज सिन्हा होरें आक्खेआ ऐ जे सरकार आम ते गरीब लोकें दी भलाई बेहतरी लेई कम्म करने लेई वचनबद्ध ऐ ते सब्बने केन्द्री स्कीमें दा लाह योग्य लाभार्थिएं गी थोआ करदा ऐ।

3 जम्मू कश्मीर सरकारै तौले गै 15 सौ सेवाएं गी ई-सरिस्तें राएं लोकें गी उपलब्ध कराने दा लक्ष्य तैह कीते दा ऐ तां जे आम नागरिकें गी कुसै सरकारी सेवा दा लाह हासल करने लेई सरकारी दफ्तरें दे भित्त नेई ठोहरने पौन।

4 उपराज्यपाल हुंदे सलाहकार राजीव राय भटनागर होरें तमाकू पर नियंत्रण सरबंधी मीडिया जागरूकता कार्यशाला गी संबोधत कीता ते मीडिया अगगे अपील कीती जे ओ समाज चा इस कबैतु गी दूर करने लेई सक्रिय रोल अदा करन।

<><><><><><>

## Amit Shah

केन्द्री गृहमंत्री अमित शाह होरें अज्ज नमीं दिल्ली च आतंक रोधी त्रीए सम्मेलन दा उद्घाटन कीता जेहदे च खुफिया ते जांच अजेंसिएं आस्सेआ राष्ट्री सुरक्षा गी मजूदा ते नमीं-नमीं पैदा होआरदी चुनौतिएं कन्नै निबड़ने उप्पर चर्चा कीती जाग। इनें चुनौतिएं च विदेशी धरतै थमां करवाइयां करा'रदे खालिस्तानी समर्थकें दियां हिंसक गतिविधियां बी शामिल न जिनें गी लेइयै बी बचार-बमर्श होग। अमित शाह होरें आक्खेआ जे नरेन्द्र मोदी सरकार देशा थमां आतंकवाद गी जड़ै थमां खत्म करने लेई पूरी चाल्ली प्रतिबद्ध ऐ। उनें अगगे आक्खेआ जे एहदे पिच्छै मोदी हुंदी आतंकवाद गी बिंदक बी बरदाश्त नेई करने दी सोच कम्म करा'रदी ऐ।

<><><><><><>

## Add Amit Shah

केन्द्री गृहमंत्री अमित शाह होरें आक्खेआ जे छड़े आतंकवाद गी नेई सगुआं एहदे पूरे पराते ढांचे ते तंत्र गी खत्म करने दी लोड़ ऐ ते इस आस्तै सरकारी तंत्र ते टीम इंडिया दी भावना कन्नै कम्म करना जरूरी ऐ। सम्मेलन च बोलदे होई उनें अगगे आक्खेआ जे आतंकवाद दे खलाफ कम्म करने आली सब्बनें अजेंसिएं गी इस सोच कन्नै कम्म करने दी लोड़ ऐ जे होर नमें आतंकी संगठन पैदा नेई होई सकन। उनें आक्खेआ जे आतंकवाद दे खलाफ लड़ाई आस्तै देशा दे अंदर बक्ख-बक्ख राज्यें दे इलावा अंतर्राष्ट्री स्तर उप्पर बी सारें गी आपूं चें तालमेल बनाइयै कम्म करना चाहिदा। इस दो रोजा आतंकवाद रोधी सम्मेलन 2023 दा आयोजन नमीं दिल्ली च राष्ट्री जांच अजेंसी आस्सेआ कीता गेदा ऐ। इस मौके एनआईए दे अधिकारिएं गी बेहतर प्रदर्शन आस्तै तगमे बी दिक्ते गे।

<><><><><><>

## LG-Kupwara

उपराज्यपाल मनोज सिन्हा होरें अज्ज आक्खेआ जे ओह लोक जेहड़े अपने फायदें आस्तै बपार कारोबार करा'रदे हे, ओह इसलै बड़े दुखी न कीजे सरकार इसलै आम ते गरीब लोकें गी सरकारी स्कीमें ते नौकरिएं दे फायदें देने लेई वचनबद्ध ऐ। कुपवाड़ा च इक किट्टै गी संबोधत करदे होई उपराज्यपाल होरें आक्खेआ जे अजादी दे बाद हुन पैहली बारी कश्मीर दे करन ते माछिल जनेह सरहदी इलाकें च बिजली पजाई गई ऐ ते 33एं ब'रें दे बाद कश्मीर च सिनेमा परतियै शुरू होआ ऐ। उनें आक्खेआ जे लोकें दे जीवन स्तर च सुधार आस्तै केई परियोजनां शुरू कीतियां गेइयां न, जिंदे कन्नै कुपवाड़ा दे लोकें दी मदद होग।

<><><><><><>

## Skill-JK

हुनर विकास मैहकमे दे कमीशनर सैक्रटरी सौरभ भगत होरें सिविल सचिवालय श्रीनगर च 85 ज्हार नोजवानें गी दिक्ती जा'रदी सिखलाई दा जायजा लैता। इनें नोजवानें दी शनाख्त ते ताल जम्मू कश्मीर प्रशासन आस्सेआ शुरू कीते गेदे बैक टू विलेज ते माई टाउन माई प्राइड अभियानें दरान कीती गई ही। कमीशनर सैक्रटरी होरें बक्ख-बक्ख सतहें पर इनें नोजवानें गी बक्ख-बक्ख शोबें च दिक्ती जा'रदी सिखलाई दी प्रगति, रफ्तार उपलब्धिएं दा जायजा लैने दे कन्नो कन्नी जम्मू कश्मीर हुनर विकास मिशन गी दरपेश

चुनौतिएं दे बारे च बी पूरी जानकारी हासल कीती। मीटिंग च जम्मू कश्मीर दे नोजवानें गी हुनरमंद बनाने ते उंदी समर्थ मूजब कम्म रोजगार दे मौके उपलब्ध कराने दे बारे च बी सोच बचार कीता गेआ। उनें सरबंघत अफसरें गी निर्देश दित्ता जे ओ होरने मैहकमें ते निजी कारोबारिएं कन्नै बी तालमेल रखन तां जे समर्थ मूजब नोजवानें गी कम्म थहोने च सखाल होई सकै।

<><><><><><>

### Jammu Airforce

भारतीय ब्हाई फौज नै कुसै बी करोपी दी सूरतै च हैलाकाप्टर दी मदद कन्नै राहत ते बचाव कारवाई सरबंधी अभियान चलाया। एह अभियान जम्मू एयर फोर्स स्टेशन च भारतीय ब्हाई फौज दी हैलाकाप्टर युनिट आस्सेआ चलाया गेआ। इस चाल्ली दी कारवाई सिक्कम च बददल फटने ते हाड़ औने पर कीती जा'रदी ऐ ते पिच्छे जनेई हिमाचल प्रदेश च बी हाड़ औने पर हैलीकाप्टरे राएं जिस चाल्ली राहत ते बचाव कम्म तोड़ चाड़े गे,ठीक उससै चाल्ली दी कारवाई दा भ्यास जम्मू च बी कीता गेआ। विंग कमांडर इरफान जैराल जेहड़े जे जम्मू च हैलीकाप्टर युनिट दे कमांडिंग अफसर न, होरें इस मौके दस्सेआ जे एह युनिट कुसै बी चाल्ली दी चुनौती दा मकाबला करने लेई पूरी चाल्ली तैआर ऐ। उनें आक्खेआ जे कुसै बी आपदा दरान प्रभावितें गी बचाने लेई बक्ख-बक्ख चाल्ली दे उपकरणें दा बी इस्तेमाल कीता जंदा ऐ।

<><><><><><>

### Date Extension(byte)

पंजीकृत मजूरें-श्रमकें दे हितै च हाल च गै निर्माण कम्में सरबंधी श्रमकें दी भलाई सरबंधी बोर्ड नै इनें कर्मिएं दे बच्चे दी पढ़ाई लेई सहायता देने दी शुरुआत कीती ही ते इस लाहकारी स्कीम लेई दरखास्त देने खीरी तरीक 15 नवम्बर 2023 तगर बघाई दित्ती गेई ऐ। आकाशवाणी समाचार कन्नै इस बारे गल्ल करदे होई उधमपुर दे एसिस्टेंट लेबर कमीशनर प्रद्योत गुप्ता होरें दस्सेआ..... बाईट

<><><><><><>

### E-Initiative

मुख्य सचिव डॉ. अरुण कुमार मेहता होरें आक्खेआ ऐ जे ई-सेवाएं दी मदद कन्नै प्रशासन ते बक्ख-बक्ख मैहकमे दे कम्में च बड़ा मता सुधार ते पारदर्शता आई ऐ ते लोक बी इंदी मती सराहना करा करदे न की जे इंदी मदद कन्नै उंदे कम्म सखल्ले, पारदर्शी ते बवस्था आले ढंगै सिर होआ करदे न, उंदा समा बी बचाह करदा ऐ ते उनेंगी बार बार दपतरें दे चक्कर बी नेई लाने पौंदे। उनें आक्खेआ जे ई-सेवाएं कन्नै हर आदमी दे जीवनै च बड़ा मता सुधार आवा करदा ऐ ते जम्मू कश्मीर तेजिया कन्नै "ग्रश्टाचार मुक्त जम्मू कश्मीर" आले प्रशासन दे लक्ष्य गी हासल करने बक्खी अगड़े बधै करदा ऐ। मुख्य सचिव होरें आक्खेआ जे 1500 ई-सेवाएं दा लक्ष्य जम्मू कश्मीर लेई तैह कीता गेदा ऐ जेहदे नै कुसै गी बी कुसै बी सरकारी लाह गी हासल करने लेई दपतरै दे भित्त नेई ठोहरने पौंगन। उनें दस्सेआ जे 1 ज्हार 54 ई-सेवा लोकें लेई उपलब्ध न ते 20 होर सेवाएं गी बी इस दायरे च आहन्नने दी तैआरी ऐ।

<><><><><><>

### Advisor Drugs

उपराज्यपाल हुंदे सलाहकार राजीव राय भटनागर होरें अज्ज श्रीनगर च जम्मू कश्मीर सरकार आस्सेआ तमाकू दे माड़े प्रभाव दी रोकथाम आस्तै कीती जा'रदी कोशशें उप्पर लग्गी दी इक रोजा वर्कशाप दा उदघाटन कीता। इस मौके उनें निर्देश दित्ते जे समाज चा तमाकू दे माड़े असरें खलाफ मकाबले आस्तै बक्ख-बक्ख हितधारकें आस्सेआ बेहतर तरीकें कन्नै पालमा ते तालमेल बड़ा महत्वपूर्ण ऐ। उनें अगुँ आक्खेआ जे तमाकू, शराब दे कन्नै-कन्नै होर दुए नशें दी शुरुआत करदा ऐ, जेहदे लेई एहदी रोकथाम आस्तै सख्त कारवाइयां करने दी लोड़ ऐ। इस वर्कशाप गी आयोजित करने दा मकसद जम्मू कश्मीर सरकार आस्सेआ तमाकू दे नियंत्रण आस्तै कीती जा'रदी कोशशें गी लेइयै मीडिया गी एहदे समर्थन च तैआर करना ते जागृति फैलाना ऐ।

<><><><><><>

### Phone In Grievance

राजौरी दे डिप्टी कमीशनर विकास कुंडल होरें अज्ज जिले दे बक्ख-बक्ख इलाकें थमां लोकें दियां दिक्कतां-परेशानियां दूर करने आले फोन लाइन इन ग्रेविनैस रिड्रेसल प्रोग्राम दे 8में संस्करण च 60 फोन कालां हासल कीतियां। जिला प्रशासन आस्सेआ शुरु कीते गेदे अपनी किस्मा दे पैहले-पैहले कार्यक्रम च विकास कुंडल होरें बक्ख-बक्ख विभागें दे अफसरें कन्नै लोकें दिएं परेशानिएं गी फोन उप्पर सुनेआ। इस कार्यक्रम दा मकसद जिले दे लोकें गी अपनियां परेशानियां सांझियां करने ते जिला प्रशासन आस्सेआ उंदे

नबेड़े लेई इक मंच उपलब्ध कराना ऐ। इस मौके डीसी होरें मकामी लोकें आस्सेआ चुक्के गेदे मुद्दें उप्पर गौर करदे होई उनेंगी उंदी जायज समस्याएं गी समेंबद्ध तरीके कन्नै हल करने दा भरोसा दोआया।

<><><><><><>

### Wildlife

वन्यजीव हफते कन्नै सरबंध समारोहें दे चलदे, चनाव डवीजन दे जंगली जीव-जन्तुएं दे बचाह आले विभाग ने अज्ज रामबन च गौरमेंट हायर सकेँडरी स्कूल बनिहाल च इक बैहस-मुबाहसा ते चित्रकारी प्रतियोगिता दा सरिस्ता कीता। इस प्रतियोगिता दा विशेष सार चिनाब डवीजन च जंगली जीव-जन्तुएं दे संरक्षण ते उंदे बेहतर भविक्ख आस्तै किट्ठे रलियै कम्म करना हा। इस प्रतियोगिता च मती गिनतरी च विद्यार्थिं हिस्सा लैता ते अपनी चित्रकारी ते भाषण कला राएं जंगली जीवे दे संरक्षण दा सनेहा दित्ता। महात्मा गांधी हुंदी जयति उप्पर वन्य जीव संरक्षण हफता शुरू कीता गेआ हा, जेहड़ा रामबन, डोडा ते किशतवाड़ सनें चिनाब डवीजन दे बक्ख-बक्ख इलाकें च मनाया जा'रदा ऐ।

<><><><><><>

### Jammu Railway Station

रेल मंत्रालय द भारतीय रेलवे बोर्ड दे मिंबर डॉ. संजय बंसल होरें जम्मू रेलवे स्टेशन दा औपचारिक निरीक्षण कीता। इस मौके उंदे कन्नै मीडिया कर्मी ते जम्मू दे केई प्रमुख शैहरदार बी गेदे हे। निरीक्षण दरान जम्मू रेलवे स्टेशन दा पूरा प्रशासन बी उत्थें मजूद रेहा, जिन्नै उनेंगी जम्मू तवि रेलवे स्टेशन दे प्रबंधन ते बवस्थाएं बारे जानकारी दित्ती। निरीक्षण दरान स्टेशन च दाखल होने दे रस्ते पर नाका, गडिडयां खडेरने लेई पार्किंग, रेल पटरिं गी नियमित तौर पर साफ करने, पीने आले पानी गी क्लोरीन कन्नै साफ रखने, प्लैटफार्में पर यात्रिं दे बौहने दी बवस्था, शौचालयें दी साफ-सफाई, रेल गडिडएं च चोरी दे मामलें पर रोक लाने लेई प्रबंध, एस्कलेटरें दे रख-रखाव, नमें प्लैटफार्म तौले चालू करने ते इस चाल्ली दे होर केई विषयें पर जानकारी हासल कीती गई। इंदे बारे चर्चा दरान केई नमें सुझाएं पर बी सोच बचार कीता गेआ। डॉ. बंसल होरें दस्सेआ जे अज्ज होई दी इंस्पेक्शन दी रिपोर्ट रेल मंत्रालय गी भेजी जाग तां जे जम्मू तवि रेलवे स्टेशन दी बेह्तरी ते विकास दे कम्मं गी रफतार थ्होई सकै।

<><><><><><>

### Medical Camp

सांबा जिले दे रामगढ़ आले सरकारी समुदायिक सेहत केन्द्र च सी.एच.सी सेहत मेले दा सरिस्ता कीता गेआ। एम्स जम्मू दे सैहयोग कन्नै जिला सेहत सेवाएं सरबंधी मैहकमे आस्सेआ लोआए गेदे इस सेहत मेले दा मकसद दूर दरेड़े इलाकें च रौहने आले लोकें गी बी इलाज मोआलजे दियां मयारी ते बेह्तरीन सेवा उंदे घरें कश उपलब्ध कराना ऐ। कैप दरान 243 मरीजें दी जांच कीती गई। इस दरान विजन लागै आलिं बमारिं दी जांच बी कीती गई जियां के शूगर यानि मधुमेह दी बमारी, ब्लड प्रेशर ते होर केई किस्मै दी जांच। इलाके दे लोकें, बन्ने कन्नै लगदे इस इलाके च इस चाल्ली दा ते भलेयां मुफ्त सेहत कैप लोआने लेई प्रशासन दी सराहना कीती ऐ।

<><><><><><>

### Poshan Mela

रामबन च सेहत ते परिवार कल्याण ते ग्रामीण विकास विभाग दे सैहयोग कन्नै कांगा ग्रां दे आकांक्षी ब्लाक गांदड़ी च सुपोषित परिवार पोषण मेले दा सरिस्ता कीता गेआ। मौके उप्पर महिलाएं गी संतुलित खुराक ते खास करियै मुट्टे अनाज दे महत्व बारे शिक्षित करने दे इलावा, पटेआली जनानिं दी गोद भराई ते अन्नपराशन आले समारोह बी आयोजित कीते गे। इनें समारोहें च 6 महीने दी बरेसु दे न्याणें गी पैहली बारी दालें आली खुराक ते पटेआली जनानिं गी हरियां सब्जियां, दुध, ताजा ते खुश्क मेवे बी दित्ते गे। कांगा दे सेहत ते आरोग्य केन्द्र दी टीम, नै सामुदायिक सेहत अधिकारी पूजा शर्मा हुंदी अगुवाई च पटेआली जनानिं दी जांच कीती ते लौहके न्याणें गी टीके लाए।

<><><><><><>